

奇妙 ê 恩典

經文：馬可福音 10:46-52

佇殘障者中睛盲是 siōng 可憐 ê，In 佇烏暗中摸。我佇神學院服務 ê 時陣，學生會 bat 發起殘障一日體驗，hit 時我選擇作臭耳聾，我用航空公司送 ê 耳塞仔佇耳朵，體驗一工聽 bōe 著聲音 ê 生活，其實是有一點 á 不便。設使選擇睛盲一定歸工撞著桌仔或是壁，甚至撞著人。佇我 ê 想法，臭耳聾或是啞口是比較容易一點點。現在因為重視福利，真 chē 盲人輔助工具產生，有盲人用拐仔，導路狗，教 In 從事按摩業或調音師為業。耶穌時代盲人 bô 可能重見光明，so-i 淪落去街 á 求乞。巴底買求乞維生，事事攏靠人。伊必須信任朋友管伊 ê 所有，iáu 需拜託人帶伊去求乞，一生過著依靠人 ê 生活。巴底買真可能 tùi 別人 ê 嘴中，知耶穌 ē 行神蹟醫病趕鬼，這可能是伊一生中唯一 ê 機會，所以不管人 ê 責備阻擋，伊 iáu 一直喊：「大衛之子耶穌 ah, 可憐我 ah!」希望 ē-tàng 引起耶穌 ê 注意。果然耶穌叫伊過來問伊講：「你 beh 我為你做甚麼？」伊堅定講：「我 beh 看見」。耶穌講：「你 ê 信救你」。

人生有 jōa-chē 時咱 tú-tiòh 耶穌? tòh 是 tú-tiòh 咱 mà 無把握機會和耶穌交談。總是巴底買卻會曉把握機會，koh 加上信心，後來得著醫治，耶穌佇其他真 chē 所在醫病趕鬼，mà 一再強調信心 ê 重要 (7:24 迦南婦女等)。總是咱要注意得醫治並 m̄ 是信心 ê 結果，卻是信心 ê 獎賞。這是人知影盡力，iáu 無法度改變現狀，上帝佇基督裡 ê 能力是無窮 ê-tàng 成就各項事。所以上帝用醫治來獎賞有信心 ê 人是一種恩典。

Tùi 巴底買 ê 故事中咱 thang 學習幾件代誌：

1. 偏見：咱常認為睛盲，伊 ê 心 mà 必一定睛盲，總是卻 m̄ 是，親像巴底買雖睛盲，總是伊目珠睛盲心 bô 睛盲，伊 chhōe 著耶穌！網路上有一 ê 故事：佇 tùi 紐約到波士頓 ê 火車頂，坐佇我隔壁 ê 老先生是位睛盲 ê。老先生是南方人，家工人是烏人，伊從來 m̄-bat kap 烏人食飯或是同學校讀冊，到北方念冊時，伊受指定辦野餐，伊 tī 請帖註明「不歡迎烏人」，結果互系主任罵。研究所時因車禍而失明。伊進入盲人重建院學點 á 字，靠手杖行路慢慢 ē-tàng 獨立生活。伊 siōng 苦惱 ê 是無清楚對方是唔是烏人，重建院 ê 輔導輔導伊，重建伊 ê 信心，成做伊 ê 良師益友，有一工輔導講伊是烏人，伊 ê 偏見 chiah 慢慢消失，伊明白無論對方是白人或烏人，人 ê 好 bái kap 皮膚 ê 色是無絕對關係 ê。車到波士頓老先生講：「我失去視力，mà 失去偏見，這是 jōa-nih 幸福 ê 事！」佇月台頂老先生 ê 太太 té 等伊，兩人親密相攬。我發現伊太太是烏人我驚一 tiô，我 chiah 發現，我視力好，我偏見 iáu tī-teh, he 是 jōa-nih 不幸 ah!
2. 明眼盲人：當耶穌經過巴底買並 m̄ 是群眾中唯一 ê 睛盲 (太 20 記載有兩名瞎子)，煞 Kan-taⁿ 巴底買求醫治。第十章有人問耶穌：「kā 我講 thang kap 某離婚 mah?」有一年輕人來求永生之道，卻因為耶穌 hō 伊 ê 答案太困難，so-i 離開。有兩兄弟問耶穌講：「當

你爲王 ê 時，阮一 ê 坐佇你正 pêng, 一 ê 坐佇你左 pêng thang mah?」注意！chia-ê 人攏是目金 ê。Kan-taⁿ 睛盲問耶穌講：「hō 我看見」，Kan-taⁿ 一個人請耶穌 hō 睛盲 ê 目珠 thang 得 tiòh 金。

當耶穌身旁圍著喪鄉人、破病人、抽餉 ê、kap 妓女，因爲伊 ê 信息激動，並得醫治 kap 赦免時，hiah-ê 有錢有勢 ê 人，khia-tī 一旁試驗伊、鑑察看伊、想 beh 害伊，真 chē 人雖罔目金，總是 in kap 主相遇時，卻佇烏暗中，因爲 In m̄ 知耶穌 苧 hia 作啥物？In 有上帝光佇 In 中卻 bô 看著伊。耶穌 m̄-bat tú-tiòh 伊無法度醫治 ê 病或趕 bōe 行 ê 鬼，總是伊卻遇著一寡無法度說服 ê 懷疑者 kap m̄ 肯悔改 ê 人。罪得赦免包括接受者 ê 意志，遮 ê 人聽見耶穌有關恩典 kap 赦免 ê 話，甚至親目看見伊所行 ê 神蹟，卻越身離去 m̄ 肯悔改。

3. 存感恩 ê 心：海倫凱勒 (Helen Adams Keller, 1880-1968) 出生時真健康，因爲破病，出生 19 個月就失去視力 kap 聽力，無久又啞口，致使海倫性情變 kah 非常 bē 穩、脾氣真 bái。後來籍著家庭教師沙利文 (Anne Sullivan) ê 努力，互伊學會曉手語，開始 kap 其他人溝通，kok 教海倫點字 kap 生活禮儀。教授方法是將手語字母按佇凱勒掌心，教伊各種物件 ê 名；將伊手指 khng tī 家己 (沙利文) ê 喉頭，「聽」其振動學習講話。又經過佇盲人學校學習 kap 口語學校學習，凱勒學會曉用盲文讀寫。1904 tui 哈佛雷地克裡夫學院畢業，成做第一位 tui 高等院校 ê 盲人畢業。對一個失明 kap 失聰 ê 人這是艱難 ê 事。海倫佇 1924 組海倫凱勒基金會。1946 海倫任美國全球盲人基金會 ê 國際關係顧問，開始遊世界，爭取建立盲人學校，並探訪病人，鼓勵 In。伊亦爲貧民 kap 烏人爭取權益 kap 提倡世界和平。海倫享冬 87 歲。伊死後因伊堅強意志 kap 優越貢獻感動全世界各地人民展開紀念伊 ê 活動。有人對伊評價：「海倫是人類 ê 驕傲是咱學習 ê 模範，濟濟 ê 有病 kok 聾、啞、盲 ê 人 lóng ē-tàng 看著向望」。海倫凱勒 bat 佇伊 ê 散文 “假使 hō 我三工光明” 中提起：設使你知影你 beh 失明你會做啥物無全款 ê 代誌？設使你真正有 chit 種 ê 經歷了後，an-ni koh-khah 按怎 to bē 親像現在用你 ê 目珠，你看 ê 一切攏會變卡親切，佇你視覺內 ê 物件，你攏會用目光去攬伊，最後你看著美麗新世界。看著海倫佇經歷人生 ê 苦難了後，khia 起來 hō 別人安慰 kap 向望，咱是 m̄ 是 mà 應該重新檢驗家己 ê 生命，珍惜咱所有 ê，爲猶健康獻上感謝？細漢時我一 ê 叔叔常常 kā 我講，上帝 hō 咱平安，應該每工感謝。咱有 jōa-chē 時刻 tú-tiòh 耶穌奇妙 ê 恩典，卻 m̄ 知恩典爲啥物物？就 kah-ná 咱戴目鏡，戴久了有時會 bē 記得目鏡 ê 存在全款，今 á 日耶穌恢復咱 ê 視覺，互咱用心去感受奇妙恩典。

巴底買 ê 故事 kā 咱講耶穌 ê 恩典免費臨到無資格領受 ê 人，咱攏是其中之一。最近 ê 成人主日學咱講起基督徒多年來 liáu 真大 ê 心思辯論，反異端、制訂教義。其實到現在每個教派 iáu 是爲家己所堅持 ê 真理講話，但是恩典 neh? 有 toh 一個教派是彼此爭論誰 ê 恩典 koh-khah chē ê neh? 今仔日咱因上帝 ê 祝福已成做中產階級 ê 教會，kap 早時教會是社會棄

絕 ê 人組成 ê 團體 bô 相像。咱是不是愛對耶穌 ê 模範提出回應？跟隨伊照顧喪鄉、破病、保護社會所棄絕 ê 人？咱教會有成立好撒馬利亞人基金，mà 有宣教基金配合社區 kap RCA 作宣教事工，總是 iáu 無夠，希望兄姊 ē-tàng 積極參與，thang tùi 小 ê 關懷開始回應耶穌 ê 恩典，盼望咱 ē-tàng 成做恩典滿滿 ê 教會。